

**Angajoqqaat erninermi sulinngiffeqarnerup naammassereersimanerani paarsisussarsisimangitsunut pisortat qanoq ikiorsiisinnaaneranut tunngasumik, siunnersuummik saqqummiussisussamik, suleqatigiissitaq nalunaarummik suliaqartussamik pileritsisoqarnissaanik Naalakkersuisut peqquneqassasut Inatsisartunut aalajangiiffigisassatut siunnersuut. Nalunaarusiami siunnersuut aallaavigalugu pisortanut aningaasatigut suut kingunissaanersut ilaassapput. Suleqatigiissitaq innersuussutini kingusinnerpaamik 1. Januar 2024 saqqummiutereersimassavaat.**

(Demokraatit Inatsisartutgruppia)

Siumumiit qujalluta Siunnersuummut imaattumik oqaaseqarfigissavarput.

Meeqqap toqqissisimasumik peroriartornissaa siunertaralugu meerartaarnerup kingorna sulinngikkallarnissamik qulakkeerinnittussaapput. Tamanna inatsisitigut naqissuserneqarluni Nunatsinni atuutsipparput periarfissaassasoq nalilerujussuurtut Siumumiit isigisarput.

Siunnersuuteqartut ajornartorsiut qaqitaat piviusuuvoq, qanorli ajornartorsiut annertutigivinneranik takussutissaqarani, amerlasuut ilaqutaarit akunnerminni imaluunnit allatigut aaqquissuussinermikkut aaqqiisarmata.

Siumumiit isumaqarpugut ajornartosiutip qiterigaa nunatsinni meeqqeriveqarnerup pissusissamisoortumik aaqqiivigineqarsimanginnerat, taamaattumillu meeqqap angajoqqaavisalu toqqissillutik inisissimanissumik paaqqinnittarfimmiissinnaanerat angajoqqaallu suliarforsinnaanerat tamanut atuussinnaagunnaarsimalluni.

Pisortat akisussaaffimminnik qimarratiginninnerareerlugit siunnersuuteqartut tunngavilersuumminni eqqartorpaat. Tamanna Siumumiit isumaqarpugut pissusissamisuunngitsumik oqariartornerusoq, illuatungaanilli pitsanngorsaanerit suli ingerlatassagut suliassatut isigisariaqarigut qanorlu iliuuseqarfigalugit.

Siumumiit pingaartipparput meeraq toqqissisimalluni ineriartorlunilu peroriartussasoq, taamaalissaguni siullermik angajoqqaajusut toqqissisimasumik inuunerminni suliffeqartariaqarput imminnut pilersorumallutik. Tamanna ilaatigut qulakkeerneqarsinnaavoq meeqqat paaqqinnittarfiini toqqissisimanartunik arlaatigulluunnit pisortat qulakkiiggannik paaqqinniffissaanik iluarseeqataasinnaappata.



Sulisarteq inuussutissarsiutiminik killilersorneqartariaqanngilaq pisortat arlaannik pissuteqartumik paaqqinnittarfiusunik amigaateqartoqalersimatillugu.

Taamatuttaaq meeraq toqqissisimanissamik ineriartornissaminillu killilersorneqassanngilaq pisortat arlaannik pissuteqartumik paaqqinnittarfiusunik amigaateqartoqarsimatillugu.

Naalackersuisut akissuteqaamminni suliassaq ingerlanneqartoq oqariartuutigivaat kommunit peqatigalugit oqaloqatigiinnerit aallaavigalugit.

Siumumii isumaqarpugut oqaloqatigiinnerit aallarniutaappata ajunngitsuusoq taamaattorli oqaloqatigiinnerit immiini naammannaviangillat aaqqiissutissat naleqartussaapput imaluunnit ersarionnerusariaqarlutik.

Nunatut inuttussusitsinni amerliartorunnaarnerput Siumumiit ernumanartutut isigivarput. Amerliartuleqqittariaqarpugut taamaaliussagutta meeqqiornerusariaqarpugut, meeqqiornerulerutta paaqqinnittarfiit ullumikkornit amigaatigineri qaangereersimasariaqarparput.

Siunnersuuteqartut tusaallugit, naalackersuisut oqaloqatigiinnermiinnerat naammaginagu isumaqarpugut Siumumiit siunnersuut ilaqutariinnermut peqqissutsimullu ataatsimiisitaliami suliarineqaqqaarluni inatsisartunut saqqummiunneqaqqaartariaqartoq.

Taamatut oqaaseqarluta ataatsimiisitaliamut susassaqartumut ingerlateqqipparput.

Hans Peter Poulsen

Siumut